

Preguntanan pa Amantenan di Horoskop

Bo a konsultá bo horoskop awe? Ta fásil pa hasi esei awendia. Bo por les'è den korant, tend'è na radio, wak e na televishon, kumpr'è na bukhandel. Algun hende ta les'è djis pa prèt, ma hopi ta studi'è promé ku nan tuma kualke desishon

Kiko ta horoskop? Tantu astrólogonan di miles di aña pasá komo esnan di awendia a kalkulá nan pronostikonan usando un wil di 12 sekshon, konosí komo zodiak. Sentro di e sírkulo ta representá mundu i e rant pafó di e sírkulo ta ilustrá e ruta diario di solo rònt di mundu. E 12 divishon (signonan) di e zodiak ta indiká e 12 konstelashon di strea ku ta aparesé riba solo su ruta.

Segun astrologia, e forsa di streanan i planetanan na moment ku bo a nase ta determiná bo futuro. Nan ta kalkulá posishon di e konstelashonnan i solo i nan relashon pa ku otro na momentu bo a nase pa saka bo horoskop. Pesei bo mester konsultá bo horoskop promé ku traha plan di plaso largu òf kòrtiku.

Maske kon rasonabel e por zona, horoskop ta lamta hopi pregunta...pregunta pa tur amante di horoskop kontemplá.

Promé ku Copernicus hende a kere ku mundu tabata sentro di universo i ku solo a drai rònt di mundu. Awendia nos ta hari hende ku ta kere esei. **Dikon anto bo no ta hañ'è ridíkulo pa lesa horoskop, ku ketu bai ta basá riba e idea kiboká ei?**

No ta molestiábo ku sientífikonan ku ta studia strea ta rechasá astrologia komo absurdo? Astrónomonan sa ku mundu ta yanga den su ruta rònt di solo. Pesei rayonan di solo ta pasa den e konstelashonnan un luna mas tempran ku síglonan pasá. Komo resultado, zodiak no a keda konstante. **Pues, asta si e pronostikonan di horoskop ta bèrdat, nan tòg ta 30 dia atrasá i no ta apliká na e signo indiká pa horoskop.**

Astrólogonan ta tene kuenta ku 12 konstelashon den zodiak. Ma nos galaksia tin mas konstelashon. **Pakiko astrólogonan ta ignorá e konstelashonnan ei ku tambe por tin un efekto riba hende?** Motibu pa esaki ta pasobra tempu ku astrologia a wòrdu inventá, nan no tabata sa ku e konstelashonnan ei a eksistí. E ignoransia ei sinembargu no ta korigí e eror.

Un otro problema ku astrologia ta ku algun hende ta nase sin horoskop. Por ehèmpel, astrologia ta ekskluí èskimonan i norwedjinan ku ta biba serka Nort Pol unda ningun planeta di zodiak ta visíbel pa vários siman den aña. **Esei ke men ku nan ta biba sin guiansa di un horoskop i no tin un destino?**

Ademas, pronostikonan astrológiko ta varia di un pais pa otro. Astrólogonan di India ta usa 12 otro signo ku esnan usá na nos islanan. Pesei, bo destino lo ta kompletamente otro si bo tabata biba na India. **Kon esei por ta si bo a nase bou di sierto signo ku ta universalmente aplikabel?**

Signonan ta basá riba fecha di nasementu. Ma hopi biaha médikonan ta determiná esei. **Ke men anto ku dòkter ta impedí bo destino?** Ademas, bida ta kuminsá na konsepsion. **Pakiko astrólogonan no ta basa bo signo riba fecha di konsepsion?**

I kiko nos por bisa di e tantísimo pronostikonan eronio di astrólogonan? Mayoria pronostiko di horoskop ta asina general ku ta parse ku nan ta salí bèrdat. Ma ora astrólogonan ta duna pronostikonan detayá, nan frakasonan ta demasiado.

Dios ta taha nos di "...spanta pa e señalnan di e shelunan..." (Jeremias 10:2). Beibel ta kategóriko: "*Entre boso no mag wòrdu hañá ningun hende...ku ta praktiká adivinashon, òf ta praktiká bruheria, òf ku ta pronostiká, òf ku ta praktiká magia*" (Deuteronomio 18:10). **Dios, no bo signo, ta determiná bo futuro.** I Dios a dunábo e libertat pa skohe bo DESTINO ETERNO. Kristo so, no bo signo, por skapábo di fièrnu.

Horoskop ta paganismo di marka mayó. No konsultá ku né. Konfia Kristo pa bo futuro...pa awor i pa eternidat.